

同州府志

第三函
函六冊

同州府志卷二十六

金石志

金石證地始水經注輿地碑目非可依附我

朝魁儒精於歐趙考獻徵文方志補要述金石志第十四

大荔縣

北周

破碑趺

僅存天和元年字類八分在城內關帝廟

隋

舍利塔銘額

仁壽元年十月立隸書

關中金石記今銘已失只此額存上有楊繼宗等題名
金石文字記同州塔銘其文曰維大隋仁壽元年歲次
辛酉十月辛亥朔十五日乙丑皇帝普爲一切法界幽
顯生靈謹於同州武鄉縣大興國寺奉安舍利敬造靈
塔願太祖武元皇帝元明皇后皇帝皇后皇太子諸王
子孫等并內外羣官爰及於民庶六道三塗人非人等
生生世世值佛聞法永離苦空同昇妙果

雍州金石記今在同州府興國寺碑爲八分書數十年前因塔毀僧俗以碑與舍利爲冢葬之惟額存焉諸佛舍利寶塔六大字字徑尺許其旁有長安香城院主賜紫義省施額長安僧善儁題額按金石文字記載碑文而不載此額今碑已不可復見而額猶存故特記之庶古物不致盡泯也又按此碑文爲隋文帝建不應又有施額之事或隋以後增置此額耳

唐

三藏聖教序記

龍朔三年五月立褚遂良正書在金塔寺

關中金石記遂良以顯慶三年卒在龍朔前應是前所書龍朔時始刻于此也

石墨鐫華此以序記并書一碑在同州後署龍朔三年書似勝慈恩本 右二碑王元美考年代官品以爲不合署名處疑皆後人附益良是但元美未嘗至關中遂不知二碑所在耳余又按玉海太宗製聖教序高宗爲太子又述記并勒碑置慈恩寺浮圖永徽四年十月褚遂良書則大塔本似是眞蹟而同州本反勝何也

金石文字記按舊唐書褚遂良傳永徽元年出爲同州刺史三年徵拜吏部尙書顯慶三年卒於愛州至龍朔三年則遂良之亡已五年矣恐是後人追刻也 王宏撰曰碑後有大唐褚遂良書在同州倅廳十一字當是後人補書法亦微不類

庚子銷夏記同州河南所書聖教序記蓋非手書上石公歿同人不勝桐鄉之思復摹刻官所實記所建歲月初不計其存亡其兩地字跡不同者摹手異耳

竹雲題跋褚河南聖教序有三本行書一楷書二行書

立石在懷仁集右軍書時二十餘年前爲宋道君瘦金書之祖今已亡之惟二楷書尙在一在雁塔一在同州在雁塔者乃其原本在同州者則河南旣歿後好事者以河南嘗刺同州故以雁塔本更刻一石以志甘棠不忘之義也玩後款但記立碑年月不稱官爵至大唐緒遂良書在同州倅廳十一字并不復摹褚書古人質直明示此本爲復刻余得萬厯間舊本模糊不可奈及在京師汪退谷以新搨一本遺余蠶蠟旣佳字尤清楚勝舊搨十倍問之退谷云曾至同州親爲洗刷亭以覆

之乃知唐人碑碣苟得好事者精意鑿蠟皆可十倍舊
搨惟恨陝人以惡烟粗紙率略搨賣以爲衣食資則全
汨本來耳退谷又言碑字刻法皆直下畫底皆方深得
漢人手意然刻既精妙如此而傳摹反至失真何歟

觀妙齋金石考略余於雁塔同州二刻之外又得一本
年月同雁塔本而字法不同碑已有斷蝕處不知此碑
在何所諸評論者皆不之及焉蒼潤軒帖跋論褚公眞
書聖教之後又一條云褚公行書聖教序碑立于懷仁
集右軍書時蓋是咸亨三年然則褚公聖教序實有四

同州府志卷三
本又金石錄載有王行滿正書聖教序并記在顯慶二
年余亦收得一本

金石萃編按慈恩寺雁塔下褚書聖教序序記各爲一
碑此碑有序無記亦無兩答勅末書大唐褚遂良書龍
朔三年建公以顯慶二年徙桂州未幾貶愛州刺史歲
餘卒則卒當在顯慶三年時年六十有三其爲同州刺
史年纔五十餘耳先是高宗永徽元年公坐事出爲同
州刺史四年九月復爲尚書僕射雁塔之刻固直其時
若同州之刻乃在龍朔三年是時公去同州二十一年

而距公之卒亦二年有餘蓋爾時梵筴西來朝野動色
皆謂得未曾有競相傳寫公之所書自非一本留傳在
同州後人重其書法之工與風節之峻故歿而猶刻之
惟公已被竄逐故雁塔本結銜於序書中書令臣於記
書右僕射上柱國河南郡開國公此僅書大唐褚某蓋
官階削去刻者不敢仍其舊且此一行孫氏鑿斥爲拙
滯蓋後人所增非褚筆也公貶同州刺史何以書於倅
廳尤不可解王氏世貞及孫氏謂雁塔同州皆屬重摹
本此三碑余曾親至其下拂拭而摩挲之石最堅雁塔

更勝迄今光澤如鏡原刻無疑可以破耳食之謬

蘭亭序臨本

褚遂良臨後有延陵之印在府學

騎都尉李文墓志

麟德元年二月立正書

金石評考碑曰公諱文而不言其姓蓋石斷而亡其半
爾文休承題其幟曰李將軍碑考唐書及集古錄金石
錄碑目皆無李姓名文者人無可紀史不悉載天下碑
闕至多趙歐不能兼收理或有之第碑又曰夫人李氏

禮不娶同姓則文似非李也唐初功臣率多賜姓而碑敘官闕有曰開國承祉得非先娶李而後亦賜姓者與休承素稱博洽且不輕妄余是以疑之

曝書亭集同里曹生仲經嗜金石文手拓同州李君碑示予紙墨精善對之眼明碑未詳書者姓氏觀其峻利秀逸非王知敬殷仲容不能造詣及此李君諱文字緯東漢以後字必以兩字稱一字者罕矣載於唐書房元齡字喬顏師古字籀李衆字師李琇字琇張巡字巡郭曜字曜宇文審字審李恢字祚李條字堅竇思仁字恕

同州府志卷三
張義方字儀此外不多見

來齋金石刻考略貞觀時有李緯太宗征遼房元齡居
守以緯爲民部尙書疏至太宗曰緯好鬚齡聞遽易之
彼緯其名此緯其字也

虛舟題跋此銘不著書撰人名氏然文特瘦削語不煩
而意足與王居士塶塔銘同疑亦是上官靈芝撰書法
瘦勁大得褚公手意亦與塶塔銘同則知亦敬客所書
二碑一在顯慶元年丙辰一在永徽二年辛亥相去不
過五六年其時同其書又同則知的爲敬客書無疑特

當時未嘗下款而敬客書名不著故知之者少耳

雍州金石記文云君時屬隨末不遑儒業所以學未優
瞻志在前鋒云云其云學未優瞻諸語可見古人直書
無隱不似近人虛美也

授堂金石跋誌敘李君與夫人合葬而標題獨書李君
唐人墓銘之例不苟爲牽連如此然於曾祖及父闕諱
而祖得書名又稱父舉晉王府參軍事晉王卽高宗未
爲太子時封號也

金石萃編按金石評考以爲碑曰公諱文而不言其姓

蓋石斷而亡其半今觀此石未嘗斷字未嘗亡且標題
已著李君之姓文中不必再言李氏下文所引典實皆
推原其始則姓自見唐碑誌銘之例如此也李文兩唐
書無傳宰相世系表隴西李氏各房俱無其人祖諱突
周書亦無傳父舉晉王府參軍事授堂跋以爲晉王卽
高宗未爲太子時封號按高宗封晉王在貞觀初年碑
敘其父云幼承詩禮早奉金籊綺歲談天齠年對月則
是舉晉王府參軍事尙在隋時下文乃述君事云時屬
末隨不遑儒業云云可證也所謂晉王者當是隋煬帝

封號煬帝以開皇元年封據碑稱李君以永徽二年卒
春秋七十有一推其生在開皇元年迨君之長正值隋
末則君生之時父在髫年也君以應接義旗授騎都尉
記官位止於此他無可述也碑書卒作卒從說文也葬
於馮翊縣似其時遷居同州矣夫婦合葬同敘一碑初
見於此碑明言夫人彭城劉氏不知何以金石評考云
李氏而有不娶同姓之語疎忽甚矣孤子武仁等亦無

考

祁國昭宣公王仁皎神道碑

年號缺張說撰文明皇隸書額正書御書二字在羌白鎮

關中金石記仁皎以開元七年卒令張說爲其碑文元宗親書石焉考兩書本傳所載並合惟擢將作大匠後轉太僕正卿新書不及之耳碑自歐趙至今從未著錄潛研堂金石跋尾按仁皎明皇廢后王氏之父也唐書后傳稱同州下邳人碑云太原祁人者舉其族望也碑文張燕公所撰而明皇親書之額題御書二大字不審出何人筆